

歐

北

集

甌北初集序

余主庚午京闈得一五經卷才氣超軼兼數人之長
場所擬詔誥復極典雅心知爲才士亟取入解額及榜
發則陽湖趙君雲崧也謁見時布衣徒步英氣逼人目
光爛爛如巖下電叩其所學自秦漢以來詩古文源流
已皆窺涉津奧遂延課兩兒子余筆墨填委時間亦屬
其草初猶遲跼才不就繩檢繼乃並肆力於古嘗見
其閱前人集一過輒不復省視然其中真氣息真境地
已無不洞燭底蘊間出一語評騭輒如鐵鑄覆按之卒
無以易也以是所見愈擴每數日輒獲一進境昔人所
云三日刮目殆無以過之已而官中書舍人入直樞要

詔命奏劄援筆立就無不中窾會余淺倚其飲助然君不自以爲能退直之下益沉思旁訊以古作者自期嘗一月中作古文三十餘篇篇各仿一家示余余爲指其派系所自君輒以爲不謬每相視而笑計自庚午冬客余邸至今七八年其所進有他人數十年功力所不能及者余所閱天下士多矣若其心悟神解舍筏登岸則未有如君之捷且易者也茲哀輯其數年所作詩爲甌北初集乞余弁其簡首昔歐陽公一見蘇子瞻卽許以出一頭地度其時坡公所挾不過如今所傳初發嘉州諸什非有後來奇恣橫絕之觀然已傾倒若是蓋珠光劍氣一見自有不能掩者君以數年卽足勝人數十年

功力英年若發來日方長勿輟其勤勿滿其志吾安能測其所至哉余孱劣豈敢以廬陵自命而君之取益多師累進益上則正未可限他日才益老學益厚萬斛之泉不擇地湧出行將卓然成不朽業如陳後山所云一代蘇長公四海名不已者此集猶特其初發嘉州時也乾隆二十二年丁丑二月通家生休寧汪由敦撰

甌北集序

吾友趙甌北觀察自黔中解官歸閒居奉母以其暇裒輯生平所爲詩約二千首將付梓郵寄示余屬爲其序嗚呼君可傳者不止此而天下後世苟資其言尙論舍是亦無以相見君少負逸才年二十餘以諸生入京師

聲籍甚旋舉京兆官中書舍人入直樞要進

奏文字多出君手每歲秋扈從出塞戎帳中無几案君
伏地起草頃刻千百言不加點辛巳以第三人及第入
翰林名益爆丐詩文者戶屢恒滿君濡墨伸紙無不滿
其意而去如李衛公行雨手中一滴平地一尺又如左
元放斗酒束脯萬人皆得周足而罷中酒脯自如世咸
以此服君然君瘠而木強雖以才爲諸鉅公所欽慕而
杜門一編翛然自遠其於榮利泊如也旣而出守鎮安
調廣州擢貴西道所至絕苞苴勤撫字能不負所學中
間嘗奉

命赴滇在征南幕下叅軍事短衣匹馬出入蠻烟瘴雨

中帷幄借籌多所贊畫事竣回任口不言勞及以讞獄
事呈吏議

天子稔君才

特命引見而君以太恭人春秋高乞假歸里修潔白之
養今且五六年不汲汲於仕進統君生平出處蓋庶幾
不愧爲完人此豈僅僅以詩文自表見者哉然君詩則
自出都後且益工蓋天才踔厲其所固然而又得江山
戎馬之助以發抒其奇當夫乘輅問俗停鞭覽古興酣
落筆百怪奔集故雄麗奇恣不可逼視雖欲不傳不可
得也余與君相識在甲戌會試風簷中已而同官中書
先後入詞館九衢人海車馬喧闐吾兩人時復破屋一

燈殘更相對都無通塞升沉之想今握別十餘年而大
集之序不以他屬而以屬余蓋以酸醎之嗜兩人有同
冰焉關河迢阻良晤爲難何日更得剪韭細論開口而
一笑也
乾隆四十二年丁酉二月同年弟鉛山蔣士銓拜撰

甌北集序

晉溫嶠恥居第二流而耘菰觀察獨自居第三人意謂
採花辛巳而於詩則推伏余與蔣心餘二人故也夫以
耘菰之才之高而謙抑若是疑是謾語不足信今年以
甌北集來索序擷之祇心餘數行而他賢不與焉然後
知耘菰于余果有偏嗜耶抑其詩別有獨詣之境已不
能言他人不能言必假余與心餘代爲之言耶嗜余與
心餘之詩之所以然俱不能自言也又烏能言耘菰哉
然去春過南昌心餘病握余手謹諉詩序一如耘菰擷
卷首一序并無然後知此二人者交滿海內而孤睨隻
視惟余是好然則余雖衰殆不許其嘿嘿然竟以不言

已也。今夫越女之論劍術曰：妾非受於人也，而忽自有之。夫自有之者，非人與之，天與之也。天之所與，豈獨越女哉？以射與羿，奕與秋，聰與師曠，巧與公輸若，與賁育、美與西施、宋朝之數人者，俱不能自言其所以異於衆也。而衆之人方且彎弓鬪棋，審音習斤，學手搏，施朱粉，窮日夜追之，終不克肖此數人於萬一者，何也？崧崧之於詩目之所寓，卽書矣；心之所居，卽錄矣；筆舌之所到，卽奮矣。稗史、方言、龜經、鼠序之所載，卽闢入矣。李衛尉之營陣，隨處可置也；熊宜僚之丸，信手可弄也。而忽正忽奇，忽莊忽非，忽沉驚，忽縱逸，忽叩虛而逞臆，忽數典而闢靡。讀者游心駭目，碌碌然不可見，叮咛或且規唐。

摹宋千力萬氣以與之角卒之騏驎追日未暮而日已
在其前所以然者又何也嗚呼此皆羿與秋師曠公輸
賁育西施宋朝之所不能言而惟越女能言之者也余
之爲耘菰言者亦止此而已矣或謂耘菰從征滇徼官
海南黔中得江山助故能以詩豪余謂不然世之行萬
里歷險艱者或十倍焉而無加於詩如故也或惜耘菰
詩雖工不合唐格余尤謂不然夫詩寧有定格哉國風
之格不同乎雅頌臯禹之歌不同乎三百篇漢魏六朝
之詩不同乎三唐談格者將奚從善乎楊誠齋之言曰
格調是空間架鈍根人最易藉口周櫟園之言曰吾非
不能爲何李格調以悅世也但多一分格調者必損一

分性情故不爲也玩此二公之言益信耘菰之所以長處余不能言耘菰之所以短處余轉能言之此卽耘菰之所以謝卻他人而必亟亟焉以詩序見屬之本意也乾隆五十年乙巳夏五隨園老人袁枚拜序

曩庚辰與耘菰訂交塞山行幄中握手談菰甚歡明年耘菰第三人及第領史職公私事冗不得恒會合比予奉諱南歸別已二紀矣耘菰則從詞垣

特簡爲廣西鎮安郡守會大軍征緬甸又奉

命從大將軍果毅阿公出邊及同任調守廣東之廣州府又

擢貴州貴西道觀察歸田以來編刻所爲詩約二千篇

寄子序之予雜誦一周其在

朝之作所交之友皆吾友所歷之境皆吾境予語所不能道者耘耔若代吾道之老病局縮鄉里顧瞻玉堂如在天上今乃舊遊歷歷影現心目省憶生平欣然以喜其出塞之作境奇詩益奇皆人耳所未聞目所未覩恍挾我之尻輪神馬而翱翔乎萬里之外快矣哉鄙客爲之頓消而神智爲之頓擴也吁詩之道大矣非才與境相遭則無以發之耘耔之才俊而雄明秀而沉厚所得於天者高又佐以學問故言之短長與聲之高下皆宜略言之不見其促繁言之不見其碎淺言之不見其輕浮深言之不見其鬱悶當其得意如關河放溜瞬息無

聲又如太阿出匣寒鉞百道茲非其才爲之與而不知其妙緒獨抽排粗入細正多膩旨妍思溢乎文句之外而未嘗徒以馳騁爲能事也且耘菰之境則又異甚夫在廊廟臺閣則有應奉經進頌禱密勿之詩在軍旅封圻則有贈酬告諭紀述揚厲之詩在山林田野則有言情咏物閑適光景之詩茲數境者人鮮克兼之若耘菰旣兼之矣承

恩優渥敷歷中外出處兩得有境以助其才有才以寫其境而耘菰之詩出焉能不爲近時一大宗哉予胸臆結約固無奇也投老一壑泥水自蔽日以頽惰爲之曳受卻走退舍避之矣若夫水邊林下扶杖逍遙與耕夫

漁父歌咏太平此予近年所得也而今此境則又爲耘
菰所兼予又何能測耘菰之所至耶乾隆乙巳長夏同
學弟主鳴盛西莊氏拜譔

語有之心之精微口不能言也豈以時易過而境不留
耶吾嘗疑之矣白傅之於元相也格調旣合工力亦相
埒而其言曰伐石者觀刻迹發矢者聽弦聲兩公之心
力必有耑至微眇而不易以告人者矣歲己卯庚辰間
予與耘菰先生鄰居寄園舊址日夕過從譔菰癸未春
同校菰禮聞夜聞君吟嘯聲與諸桐嶼聯句至百韻達
旦相示才氣橫溢辟易萬夫比出關數日耳側猶作砉
甸砉淅聲欲出一二語以舉似之而竟未得間後八年

予視粵東學政而耘菰守廣州辛卯秋遷貴州兵備道
將受代未行一日獨與畫師吳水雲買小舟探羅浮華
首冲虛諸勝子時試諸郡畢日坐使廨藥洲上想君詩
思眈眈在海天雲石間亦欲於贈行時題記數語又未
得遂也今耘菰之詩哀然成帙旣登於梓者二十七卷
郵寄示予且屬以一言君方掌教邗江之上而予於二
千里外披誦前後諸什坐臥不能去宜有以發揮集中
之所得矣然旬日以來把卷馳湧如見先生雙眸射人
搖郝撚髭於烟月之間而其詩境裨兀奇宕音在空外
背人評魯公書力透紙背與褚河南書用筆高出紙上
寸許者其理正同吾安得執一解以印定之所謂欲着

言詮輒落邊際視往日之匆匆未暇舉似者又不同也
它日晤耘菘對案伸紙必有所以相質者矣乾隆歲次
乙巳秋九月旣望同學弟大典翁方綱拜書

成詩易成家難成名家易大家難一篇一聯一語之傳
流播人口有發篋而視之者澌然盡矣小集中集總集
之傳抄撮人手有奪幟而樹之者退然沮矣有如海之
才而又深之以學讀萬卷行萬里耳目睹記之所及心
思智計議論之所發皇推倒開拓惟我所向一編旣出
使人不知我以家而不得亟名我以家而不得而家於
是乎成成於是乎大陽湖趙君耘菘爲予館閣前輩壘
坳所至辟易萬夫開濶以來兩更歲甲其間江山之涉

歷風土之揚推士馬芻糧之諏議與夫量移遷擢諗養
歸栖之迹一一發之於詩因合向所爲詩曰甌北集者
刻成示子而徵序至再予以君有老年不向人求序之
句也又曰松泉少師序之二十九年以前心餘編脩序
之九年之前旣傾倒推挹而無可以贅說也姑以其名
集之義測之或曰交趾周駱越秦時曰西甌或曰今珠
崖儋耳古謂之甌人君以領郡兩粵間勞心撫字不忍
忘其地或曰古卜相故事書姓名覆之金甌而探之君
早直機庭嫻內制旣入翰林

天子稔其名姓俾守鎮安贊定邊將軍永昌幕府調廣
州擢貴西道故雖以疾告而不敢忘其用或曰唯唯否

否君智計如鴟夷談吐如滑稽其以名集猶之缶鳴甌
甌洞而甌北則猶之硯北也甌之材徵諸土候諸火其
以爲深盃者從方言陳魏宋楚之間謂之甌自關而西
謂之甌其大者謂之甌也其以爲小盃者從方言滂甌
謂之盃其小者謂之升甌也甌於缶爲大而許叔重專
以容升之甌當之猶爾雅甌甌謂之甌注甌甌小甌長
沙謂之甌不知甌甌固培婁之轉而甌從區區實四豆
豆實四升不得槩以謂小若甌若甌若甌雖屬缶而亦
冶金爲之在埴之土惟陶者之所甌在鎔之金惟冶者
之所鑄君之爲詩各隨乎濃淡奇正短長高下之宜而
有以極其致屈步之蟲漫畫之鳥予方內愧而不敢以

報焉然予不能有大家之才之學而心易夫名家讀近時諸家詩如君者不一二數矣茗香酒熟手是編而細論之君其不以予爲蹢脫而棄之也夫乾隆乙巳六月二十一日館侍南匯吳省欽撰

房師趙耘菰先生刻向者所爲詩二十四卷成名曰旣北集於己亥春郵示越三年又益以近藁三卷命德麟事核讐之役竊惟先生生平所歷當其直樞要遊翰林致身清華廣颺盛際以及諗養歸棲絜膳之暇歌咏太平其詩之工且多宜也若夫出守兩粵備兵黔中從軍滇徼簿書填委戎馬倥傯而亦不廢詩若寢饋之於人有一日不可離首嗚呼可謂好之篤爲之專矣旣三

卒業客有過余而論先生之詩余告之曰先生之詩茂
矣美矣廣矣大矣夫其鏘鏘訓典翔集子史原本山川
極命草木先生之閎也毛嬙西施去之鉛黛名葩異莠
助之月露先生之麗也論世知人雕繪萬象依經立義
折服五鹿先生之辨也司契因心鍊剛統指彎弓不發
惜墨如金先生之謹也其志廉以潔其辭安以舒其風
骨藻耀而高翔其神采綺交而脉注今之作者蓋莫之
或及也客曰今之作者何如余曰方今矢詩遂歌雅材
輩出人人握靈蛇之珠家家抱荆山之璞然其弊有二
一在好奇一在鬪靡好奇者索隱行怪往蹇來連如豨
膠吻腐鼠嚇鵠則失之愚也鬪靡者釘言餽韻假寵乞

靈樹蘭不芳刻木無氣則失之僞也先生之詩有一於是哉客曰子得毋獻諛師門乎夫連城之璧或指微瑕千里之駒亦聞蹙足甌北之詩傳則必傳矣而亦不無可議者予何揚榘之甚也余請其說客曰甌北之詩好見才余曰韶濩之樂不以孤籟成均富貴之花不以單跼耀采先生非好爲馳騁也博乎文而已客曰甌北之詩好論駁余曰孟子之言盡信書不如無書莊生之論以指喻不若非指先生非好爲攻擊也主乎理而已客曰甌北之詩好詼笑余曰左氏作傳不盡莊言東方載牘善於諧謔先生非好爲嘲弄也涉乎趣而已客曰是則然矣然甌北之詩雖沿溯乎漢魏六朝三唐而其得

力則似專在宋人焉余曰若子之言是真非能知先生者夫詩本性情不尙流派學宋人詩者大率多纖縹滑利之習麤厲噍殺之音其於三百篇溫柔敦厚之旨或遠焉今先生之詩具在子試取而讀之館閣褚什非阿之矢音乎軍旅諸什非新田之起興乎貴西諸什四牡之懷歸乎歸田諸什非衡門之樂饑乎至於風百以思君子伐木以求友聲鷦和以納規誨原本三百篇出其和平大雅於羣音繁會之曰不斤斤求合古人而自無不合且有超古人之意表者何必漢魏六朝三唐又何必不漢魏六朝三唐也客始不能對逡巡辟席曰微子之言無以開鄙入之惑某雖不敏願終身而事之

客既退敬書所論列者跋於先生集之後乾隆五十年
歲在乙巳秋八月既望受業祝德麟謹序

甌北集序

昔嚴滄浪之論詩謂詩有別材非關乎學詩有別趣匪關乎理而秀水朱氏譏之云詩篇雖小技其源本經史必也萬卷儲始足供驅使二家之論幾於枘鑿不相入予謂皆知其一而未知其二者也滄浪比詩於禪沾沾於流派較其異同詩家門戶之爭實啓於此究其所謂別材別趣者只是依牆傍壁初非真性情所寓而轉蹈於空疎不學之習一篇一聯時復斐然及取其全集讀之則索然盡矣秀水謂詩必原本經史固合於子美讀書萬卷下筆有神之旨然使無真材真趣以驅使之則藻采雖繁臭味不屬又何以解祭魚點鬼疥駱駝掉書

袋之誦乎夫惟有絕人之才有過人之趣有兼人之學
乃能奄有古人之長而不襲古人之貌然後可以卓然
自成爲一大家今於耘菘先生見之矣耘菘天才超特
於書無所不窺而尤好吟詠蚤年登薇垣直樞禁游翰
苑應制廣和頃刻數千言

當宁已有才子之目及乎出守邊郡從軍滇徼觀察黔
西簿書填委目不暇給而所作益奇而工歸田十數年
模山範水感舊懷人之詞又口出而未有艾也最耘菘
所涉之境凡三變而每涉一境卽有一境之詩以副之
如化工之賦艸本千名萬狀雖寒暑異候南北殊方枝
葉無一相肖要無一枝一葉不栩栩然含生趣者此所

以非漢魏非齊梁非唐非宋而獨成爲耘菰之詩也或者以耘菰老於文學在京朝循資平進卽可升秩槐棘且在方面有循良聲不久當膺開府之寄乃退而以詩自名疑若未展所抱者予謂古人論三不朽以立言居立功之次然功之立必憑藉乎外來之富貴無所藉而自立者德之外唯言耳姚宋郭李諸公非身都將相則一田舍翁耳吾未見言之次於功也書有一卷傳亦抵公卿貴耘菰嘗自道之矣知難而退從吾所好耘菰蓋自信其材其趣其學之足傳而不欲兼取以托於老氏之知止焉耳試質之耘菰其以吾言爲然乎否

乾隆庚戌四月旣望同年弟嘉定錢大昕序

甌北集目錄

卷一

詩五十八首

卷二

詩六十八首

卷三

詩七十二首

卷四

詩四十七首

卷五

詩八十三首

卷六

詩四十首

卷七

詩七十

卷八

詩五十首

卷九

詩九計首

卷十

詩九十三首

卷十一

詩九十首

卷十二

詩七十四首

卷十三

詩八十一首

卷十四

詩四十六首

卷十五

詩三十八首

卷十六

詩六十八首

卷十七

詩七十一首

卷十八

詩七十六首

卷十九

詩六十三首

卷二十

詩九十首

卷二十一

詩九十六首

卷二十二

詩七十首

卷二十三

詩八十一首

卷二十四

詩八十五首

卷二十五

詩一百四首

卷二十六

詩一百六首

卷二十七

詩一百首

卷二十八

詩八十四首

卷二十九

詩八十五首

卷三十

詩一百十七首

卷三十一

詩一百零四首

卷三十二

詩一百十首

卷三十三

詩七十六首

卷三十四

詩五十九首

卷三十五

詩一百十三首

卷三十六

詩一百三十三首

卷三十七

詩七十五首

卷三十八

詩九十八首

卷三十九

詩一百五十首

卷四十

詩九十九首

卷四十一

詩一百二十二首

卷四十二

詩一百二十二首

卷四十三

詩一百二十三首

卷四十四

詩一百二十三首

卷四十五

詩一百二十七首

卷四十六

詩一百十七首

卷四十七

詩七十二首

卷四十八

詩一百二十九首

卷四十九

詩六十四首

卷五十

詩一百零六首

續增詩集三卷

甌北集目錄終

甌北集卷一

起丙寅
至戊辰

陽湖 趙翼 雲崧

古詩二十首

人目住在天但知住在地天者積氣成離地便是氣氣
在斯天在豈有高下異蒼蒼非正色仰望謂天際試乘
高視下亦復濛濛翠乃知地與天相隔不寸計人生足
以上卽天所涵被譬如魚在水何處非水味世惟視天
遠所以肆無忌

五色石補天幻語滋世惑豈知語非幻理可推而得五
金在石中邃古人莫識女媧辨物性煉之以火德其色
恰有五青黃赤白黑制器旣必需生財亦不測用濟天

缺陷功在彌縫隙是謂石補天非天有破裂

先聖治天下因俗制典禮其有未盡善原弗禁改毀卽如祭用戶雖云求諸似祖父拜兒孫究未協於理井田各百畝養民意本美安能禁人間一父只一子俗儒識拘墟硜硜守故紙或言古制非攻者輒蠡起豈知窮變通聖人固云爾是古而非今一步不可履爲語魯兩生勿膠成見鄙

仙者長不死元會爲冬春安期羨門輩宜其至今存何以五代來但聞呂洞賓從前度世者無復示現因豈非怪喬流世遠亦就湮多活數百年終歸墮劫塵惟有古賢傑身去留其神或文采映發或英烈炳麟照耀人耳

目千載猶鮮新與天地同朽此乃真仙人

陋巷有一士每夕露禱天天神憫其誠來問所欲言士也叩頭語所願殊茆茆不求拾青紫不求擁金錢但期衣食足了無塵事率朝則茅簷曝夕則布被眠泛舟水之涯倚杖山之巔天神忽大笑此樂惟真仙青紫或可覲金錢亦可權獨餘清閒福上界所最慳世果有此樂吾亦來世間

謂性有可移橘過淮則枳謂性有不變鷹縛絲亦喜聖言性相近其說渾渾爾孟氏救世深特標性善旨眼白識王敦面青識盧杞一見定其人終身弗改徙藉非有性惡何以驗若此後儒強爲詮分別氣與理旣名之曰

性理早落氣喪舍氣而言理又一重障矣

范蠡既霸越一舸笠澤中手挾西施去同泛烟濛濛人
謂謀身智吾謂謀國忠惟恐浣紗人又入越王宮荒醺
再釀亂覆轍蹈甬東所以絕禍水脂粉一掃空賢士旣
致君更慮鮮克終徒以遠害論猶未測其衷

袁世尙名義作事多矯激郭巨貧養母懼兒分母食何
妨委路旁而必活埋丞伯道避賊奔棄子存兄息何妨
聽其走或死或逃匿而乃縛之樹必使戕於賊事太不
近情先絕秉彝德獲金豈真報乏嗣實陰殛君子依乎
中孝友有定則

武侯事先主身任帷幄籌草草隆中對後來語皆酬如

何一着棋忘却援荊州有明于忠肅再造功誠優景泰
七八年軍國皆其謀如何易太子不聞諫疏畱千古兩
偉人駿烈無與侔千古兩疑竇未免滋瑕尤當時或有
故事往難推求九原不可作望古長悠悠

長統樂志論潘岳閒居賦抗懷托高尙千載令人慕吾
觀仲公理州郡辟不赴及舉尙書郎胡不聞誓墓遂叅
曹瞞軍入幕腹心布濯水追涼風此樂竟弗顧安仁本
輕躁勢利趨若鶩板輿奉母遊矯語甘淡素望塵拜買
謚抑何工諂附乾沒不知足翻貽老親懼乃知曠達信
大抵十九寓一朝見可欲鮮不失故步徒以言取人動
爲古人誤

六朝前祠廟多祀城陽王蔣侯加帝稱享之如明堂其次項羽神卞山赫烝嘗後來時代改氣燄皆消亡乃有關壯繆威靈久始彰雕續崇像設面赤長髯蒼婦孺盡膜拜血食徧八荒惟公秉忠義固與日月光然古烈丈夫屈指難具詳彼皆就湮沒此獨垂無疆鬼神亦聽運何況人行藏

有唐裴行儉論士先器識謂四傑雖才浮薄宜擯抑乃其所賞拔亦未見英特薦一蘇摸稜庸庸但伴食而所擯抑中路丞起吏職草檄斥武墨發憤佐討賊舉事雖不成慷慨見骨力糜身赴忠義此豈浮薄列是知鑒早謬目已迷白黑不辨品邪正但卜遇通塞斯亦肉眼耳

真士何由得

嚴光與李泌皆共帝王卧一則去不返一則起相佐者
論高蹈風子陵固不挫豈知衣白人相業亦甚播近護
太子危遠紓吐蕃禍鑿鑿副名實力有回天大使皆托
鴻冥國家事誰作公獨爲其難豈厭辟穀餓回首披裘
翁蒼山但晏坐區區一釣竿寧勝芋半个

梅花最高格羣仰絕世姿離騷擷衆芳無一語及之西
詞 艷色天下奇堪笑浣花老亦弗畱一詩乃知

卓犖人胸次故不羈吟咏出興會萬物供驅馳興會偶
不屬目固弗見眉豈比雕繪家掇拾靡有遺

元勲郭崇韜自詭汾陽後西征拜其墓涕泣奠卮酒方

托華胄榮旁觀早掩口樞使狄漢臣起家弓箭手或贈
梁公像卻之弗敢有吾豈名卿孫而涅猶未朽兩人皆
不學人品於焉割謙退彌覺高攀附益增醜此處關才
識識陋事必苟所以平蜀師元戎喪厥首武襄終自全
弭鱗角生狗

歐九不讀書乃修唐表志子京澁於文偏任作傳記巨
手如二公猶嫌易位置何況羣材紛各欲及鋒試及其
應世用動輒違所肆鳬頭續鶴頸牛鼻穿馬轡用必當
其才古來無此事

伯時擅丹青神到秋毫顛宣和愛遺筆幅值數百千甚
或持獻者布衣輒得官使其作畫時矜重索價懸豈特

戰材聚輦金當如山龍眠乃長嘯供養資雲烟惟得數
君子詩文十餘篇由來藝事妙正以人品傳設令有市
心畫已不值錢

古來作史記一家私著錄但求文之工好逞臆見獨是
非或多謬往往得禍酷邱明以瞽廢馬遷以腐辱班椽
繫綬縲中郎困牢獄陳壽旣被放蔚宗亦就戮魏收剖
及屍崔浩誅及族由其獲報顯可知用筆曲後來屬官
書編纂自朝局成之非一手屬之有衆目記載較可憑
畧少寃鬼哭是以撰述家多保名位祿卻嫌文又劣難
繼古人躡金元太缺畧宋又太繁複

文人逞才氣往往好論兵及乎事權屬鮮見成功名古

來稱儒將惟有一孔明寥寥千載後庶幾王文成此外
白面徒漫謔韜畧精河橋二十萬惜哉陸士衡深源令
僕才身名喪北征房瑄陳濤斜車戰旋摧崩忠如張魏
國五路敗富平由來非所習奴織婢學耕如何紙上談
輒欲見施行君看雲臺上何曾有書生

世傳房次律前身永禪師樂全未了經再生寫成之其
說主輪迴其理或不欺人乘生氣生氣散則滅漸旣散
豈復聚還又爲生機譬如花落後明年開故枝寧必舊
花魂來作新花姿佛家論往生冥報昭若著可以寓懲
勸世教固有資細推陰陽故幽渺終可疑所以季路問
聖亦言不知

東坡洗硯池歌

吾郡顧塘橋蔣氏宅有石池一形似槽長三尺
許深半之相傳爲東坡洗硯池按公生平居常
者再元豐八年春被命許歸陽羨遂居常州未
幾赴登州任其所居今不可攷建中靖國元年
自嶺外歸五月至真州病暴下復止於常據方
嶽深雪偶談述公是時先卜居陽羨已用五百
緡買宅矣夜與邵民瞻步月聞老嫗哭聲詢知
以將徙宅故卽公所買宅也遂焚券不索其值
至毘陵借顧塘橋孫氏宅寓焉是歲七月卽歿
於寓所然則顧塘橋宅乃公晚歲所居此池亦

卽養疾一二月中所用也今蔣氏宅相傳卽當日孫氏故址池幸無恙名賢遺跡良可寶也爰作歌記之

是誰斲取銅官石節角四周腹深尺傳是東坡洗硯池
一斛清泉浸寒碧公昔投老居常州顧塘橋儼孫氏樓
翩然乘雲倏仙去手澤惟此一器畱讀公集硯可數御
黼硯王齊愈龍尾硯孔毅甫丹石硯唐林父更有石鐘
鏗銅雀古窪或形似瓢欹或狀如斧是皆公所銘而公
非硯主諒未洗向池中墨花舞公之硯鳳味工許硯乞
從孫莘老洮硯貽自黃涪翁沙湖所獲文有呂定國所
贈字作風以及紗縠行中掘地得魚膚淺碧非人功類

皆聲銅色寒鐵不比青州石末兼絲紅未知何者攜向
此池洗至今硯去池已空我想當日瓊海歸來托無地
途次真州已下痢賃廡聊復養衰疾豈復能作文字戲
得非嶺外日久苦筆墨焦取煤幾致茅屋燼握管直似
驢蹬搖一朝北還復得諸葛散卓毫常和劍脊膠不覺
見獵心喜技癢不可搔想當臨池手自滌殘墨解衣磅
礴氣尙豪光浮金星銀星燦波映鵲眼鸚眼嬌餘瀋續
紛灑作雨疑有潛虬下噴黑浪高噫嘻乎身行萬里半
天下晚就吾鄉來羽化遺此石池湛不瀉似與此邦之
人獨結翰墨緣風雅千年相枕藉雖輪定州雪浪質已
過壺中九華價莫同岐陽石鼓作柱礎好共吳興碑亭

覆深厦

梅花詩

芳信誰吹暖律微一枝開獨破寒威香生紙帳春何處
人住山齋雪正飛生面素娥清入畫前身高士白爲衣
東風動我巡簷興起踏空庭趁曉霏

冰霜滿野怯憑欄忽露陽和一點看似育力能回造化
未妨身木出寒酸不知驛使將誰寄尙笑騷人未及餐
莫以早開嗤蹊進要他領袖百花端

生是牟尼不染身亭亭獨秀了無塵好同姑射稱仙子
曾到羅浮化美人瘦影當窗高在格素粧臨水淡傳神
笑他何物林逋老唐突西施要結親

世眼空懸色界邊誰知冷蘂別成妍衆芳皆後真香祖
同調無多只水仙踏凍來尋甚屢滑忍寒相對繡帘寒
著花老樹嫣然處箇是人間枯木禪

江南江北枉相思何處探春見一枝古寺月明僧定夜
空林雪滿鶴歸時尙愁琢句人難寫可惜尋芳蝶未知
近被俗流爭托附又嫌無地寄幽姿

漫誇柳雪與梨雲比較孤芳品已分一到歲寒誰伴我
每逢月落便思君丹青手筆難描影鐵石心腸許作文
剩欲訂爲交耐久江城笛好數相聞

舟夜

扁舟夜泛滿湖東一片清秋月滿空映水橋圓雙破鏡

側風帆約半開弓。鴈更欲喚蒹葭白。蟹信將催穉稻紅。
貪聽吳歌忘坐久。滿身衣濕露濛濛。

杭丈應龍先君子執友也。以余久廢舉業。令兩郎
君杏川白峯。邀爲文會。詩以誌感。

疎狂久作子光陰。砥礪鏃慚叨古誼。深東郭履甘貧士跡。
西華帔累故交心。纈絲新課同功繭。操縵重調舊譜琴。
便合窮經風幔底。敢同漢上但題襟。

與杏川白峯廷宣震峯踏春醉歌

東風吹來軟於綿。黃鶯喚人不得眠。相邀勝侶踏青去。
平蕪彌望春如烟。化工何許萬針線。一夜繡徧枯山川。
是時天桃藥方綻。欲放未放含紅嫣。枝間已有嫩蝴蝶。

與我衫袖同翩翩人生難得少年暇暇矣又少良朋聯
今朝得閒又得友况遇風日清而妍此是天私我輩樂
忍能局促守一編典衣沽酒藉草飲高歌金石聲淵淵
狂名一日里中徧措大必帶三分顛歸來書窗月已出
相顧而笑稱散仙采石錦袍黃樓笛此樂動論數百年
江陰登君山作

春申遺跡渺難攀覽古蒼茫上碧孱小邑萬人爭館宇

時學使按臨
多士雲集

近游百里得江山市喧魚蟹乘潮上風急帆檣

掣浪還欲擬洞庭湘瑟句數峯青入暮雲閒

題閩典史祠

傳芭伐鼓判羊豕前代孤臣今代祀不讐枯骨國法

寬不忘忠魂民意美是時 王師下金陵大江以南望
風迎小朝廷已被俘去爲誰保此彈丸城國亡援絕獨
拒守作計雖謬心則貞姓名已入黥鬼箠滿城皆鬼作
鬼兵以鬼易人一當一人則怕死鬼怕生梯衝環攻百
道禦積屍高與雉堞平縛芻爲人夜取箭絕絙出卒霧
斫營軍久絕糧鼯鼠掘土不解甲蟻蝨生相持八十有
一日一日中有千輪贏君山礮聲沸江水鐵騎平明滿
街市短兵巷戰血尺深袒臂一呼仆者起力盡俱甘駢
首戮至今白骨填荆杞嗚呼明季雖多殉節臣乙酉之
變殊少人將帥降旛蚤監壘公卿款表先趨塵高門王
謝獻城亟盛名巢山拜路頻何哉節烈奇男子乃出區

區一典史

紅梅

等是冰霜骨偏看着色殊高人多倚醉仙女亦施朱伴
鶴迷丹頂先蘭試絳趺天桃休便附終遜一分臞

題史翼宸明經天尺軒

翠柏深垂似柳絲書堂籤軸許吟披虛慚高士南州榻
豈有才人北郭詩翦韭春盤三雅酒挑燈夜雨一枰棋
他年細數鴻泥跡應最難忘是此時

呈家謹兄教授

臞骨長身一鶴如典型猶見古風餘兩齋弟子胡安定

三策賢良董仲舒

先生曾上萬言書

款戶屢聲人問字隔簾經義

婢傳書師資幸得依宗老請業何辭月滿除

步邨落偶成

六枳編新籬一亭臨古渡但聞桂花香不見桂花樹

青山莊歌

毘陵城北皆平地何許林巒疊層翠路人說是青山莊
門帖新題官賣字我來出郭偶經行欵戶曾無主出迎
繡闥雕甍空尙在殘山剩水不勝情頭白園丁老扶病
爲余縷述資談柄園是前朝貴介爲依稀記得延陵姓
後屬安昌相國孫廿年行樂尤繁盛相國勲名在廟廊
清貧未有午橋莊令孫繼起爲方伯分陝曾裁召伯棠
罷官歸徙常州住百畝林扃供散步入門便隨舊規撫

大笑前人太寒素已編錢埒買堂成捩倒金籬將地布
不覺松杉也改觀何曾臺榭還如故綠垣甃與枳編籬
砥室築臨花夾路十馬馳毬關作塲百牛拖石排依樹
粉本溪山似幃懸壁衣簾溷皆紗護一重一掩景廻環
某水某邱途錯互倚杖疑探栗里幽汎舟訝入桃源誤
勝賞經年興不殘四時花鳥暢游觀清音警露鳴仙鶴
浩態嬌春豔牡丹西府海棠移釵砌上林盧橘植雕闌
跳波魚婢能知樂挂檻鸚哥解勸餐園林成後教歌舞
子弟兩班工按譜法曲猶傳菊部爭新腔催打花奴鼓
反腰貼地骨玲瓏擎掌迎風一媚嫵阿誰棋墅伴壺觴
綈几羅幬樂未央幸舍賓朋珠履貴便房姬妾翠鈿香

傾城妓入籠鶯館要路官登射鳴堂熱客倚冰終日計
乞兒向火一羣忙主人自顧矜豪放揮霍不將錢籠障
博局籌償舊帑錢纏頭錦出新花樣茶經蟹眼淬旗槍
食品腥脣調醢醬蠟淚成堆更燕膏酒瓶卧壁仍傾釀
笙歌酣倚賞花亭釵火醉歸邀月舫自製當筵上壽詞
青山與我長無恙豈知卮漏比泉流猗頓潛懷折閱憂
已失又思求塞馬未蹊輒欲奪田牛豪名本足招人妒
禍事真成與鬼謀張樂正期投轄飲叩門忽報檻車收
填尸園土悲黃犬回首歡場付爽鳩春夢一場那可再
祇今惟有青山在青山也要屬他人官價三千聽人貸
猶憶倉皇對簿趨難憑複篋寄銷銖委地圖籤爭剔玉

隨身衣履敢留珠翻教百口求春賃那有千金賄獄輸
籍到平泉花木簿林霏亦似淚模糊平生枉使錢如水
此日人情薄於紙有誰廣柳路旁迎并少綠珠樓下死
老僕如今也入官仍充閹戶守荒寒飢窮全仗遊園客
給一文錢一度看往日監門梁肉厭近時失路斗升難
我聞此語心裊觸信有興衰如轉轂重向林巒曲折尋
繁華彷彿畱人目垂楊影裏釣堪垂秋樹根邊書可讀
愛山我乏買山資有山渠少看山福空餘別廟祀花神
自塑泥身占巖谷書寢香消落燕泥空堂氣冷飛蝙蝠
平津廐庫古曾悲華屋山邱今莫哭梓澤風流昔未經
踏春偶到訪池亭無端一段園丁話說到傷心不忍聽

日暮歸途回望處夕陽猶照晚山青

戲贈性海上人

小茅庵底酌香醪詞客詩僧兩老饕偏袒右肩獅獨吼
堅持左手蟹雙螯參寥戒爲狂來破蘇晉禪須醉後逃
灌頂醍醐原佛諦未妨世眼笑醅醕

十不全歌

世間萬事無不有奇形乃見支離叟眼無縫頤有紐胸
怒蛙頸瘦狗足一腿手半肘倮然一身叢百醜市頭坐
乞錢人呼十不全天生是使獨彼亦不知所以然我讀
山海經人生初本無定形或蛇身牛首或三臂獨肱臍
爲口無舌乳爲目無睛天公見之不好看逐件端相細

改換譬如塑佛欲成滿月面鼻大減幾分口小拓幾線
自從鑄就人樣子化工能事始畢矣聽他夫妻父子依
樣畫葫蘆大概不出範圍裏何哉爾獨缺不完縮長凸
短雙必單得非女媧搏土未定稿千年拋落荒山道爾
托生時不暇擇負之由胎太草草獨眼龍稱豪英豁鼻
馬爲公卿瞎兒一淚亦大貴鑿齒半人且得名爾則手
不能持足不能行同在覆載內天枉地枯過此生噫噉
乎謂出自天意生之胡令痼疾廢謂是惡所招受形時
豈卽召戾將無輪回果報信有之今生若是前生致不
覺對之爲悲涕願天生好人願人行好事

苦雨

事有不如意韶華夢裏過一春晴日少三月落花多空
擬乘吳榜誰能挽魯戈遙山亦含悶煙際燈修峨

新霽同杏川諸人散步

積雨江村綠漸稠喜逢霽景豁吟眸春留紅藥拖殘尾
雲放青山出一頭聲在樹間禽姓杜香尋花底蝶爲周
郵翁莫笑貪兒戲我是人間馬少游

五牧鎮爲宋將尹玉戰死處

五牧塘邊路經過弔夕陽一軍忠義鬼兩岸戰爭場地
尙多遺鏃祠今有奠觴當年運河水想見血如湯

題黃丈季游梅花小照

雪作寒交月作鄰水邊疎影木前身始知畫手傳神好

只

獨山拔地起邱壑頗幽偏骨立通身石腰藏一眼泉離
家無十里結屋有三椽五岳茲遊始題詩紀歲年
僧寮留一宿萬象沈寥中夜色高樓月秋聲落木風身
臨白雲迴心與碧天空安得辭塵鞅來營一畝宮

陽湖晚歸

布帆輕漾晚風微回首陽山正落暉鷺點碧天飛白字
樹披紅葉賜緋衣詩情澄水空無滓心事閒雲澹不飛
最喜漁歌聲欸乃扣舷一路送人歸

黃天蕩懷古

打岸狂濤捲白銀似聞桴鼓震江津歸師獨過當強寇
兵氣能揚到婦人有火誰教我箭射無風何意海舟淪
建炎第一功終屬太息西湖竟角巾

航海先傳警蹕趨孤臣猶自矢捐軀小朝氣象偏安局
半壁江山百戰圖龍廟尙傳舟似馬鶴河終恨幕啼烏
章安不作崖山覆容易諸公赤手扶

題明太祖陵

鍾山陵寢鬱嵯峨四海當年一奮戈宋祖應慚燕地少
漢高猶覺泗亭多金鳧氣冷消涼雨石馬年深卧綠莎
何代不留興廢慨英風要自耿難磨

戡亂兼能致治平規模宏遠照寰瀛身從乞食艱俱賦

目不知書學自成養士未流猶氣節親儒初運已文明
始知三百年天下盡是關天一手擎

定鼎金陵控制遙宅中方軌集輪鑣千秋形勝從三國

一樣江山陋六朝燕啄皇孫傳豈誤

謂靖
難師

狗烹諸將亂終

消運移恰稱懷宗烈多事辱王此續貂

聖代深仁到九幽玉魚金盃護林邱有人周陞班三恪

無恙唐陵土一抔猶見丹青藏寢廟

明祖御容
尚在廟中

豈聞樵牧

及松楸居民共說春秋節每見祠官祀典修

太平寺修塔歌

太平古寺擅名蹟貫河清濟昔所稱

舊有郡人徐友書清濟貫河
一筆繫繞數十丈傳爲名蹟

年深窳堵廢半截禿髻頂似頭陀僧是何住持起太息

修復弗顧力弗勝手書齋疏榜衢市募布地金恐不贍
初以福利聳人聽謂文筆峯宜峻嶒旋設木關釘足坐
欲使觀者悲憫增慘同割肉飼飛鳥創甚鉤體然明燈
未幾錢帛果泉涌庀材筮日工作興百艘運甓塞廣路
千夫輦木拖長輶圻人梓人畢趨役邪許聲應鼙鼓整
屹然遂見刹竿矗擎天柱地高於陵丹碧晃耀欲怖鴿
墁聖潔精難點蠅雲浮朶棟漏寶網風語鐸鈴搖金繩
欄楯鉤連梯詰曲拾級可以階而升羊角盤旋一千尺
螺殼宛轉六七層落成鐘魚集海會經聲佛號香霧騰
遊人屐齒日幾折我亦買勇試一登百里川原景緯續
滿城煙火氣鬱蒸靈峯飛來平地卓化城現出甍空凌

喟然深歎營造績豈佛力大實式憑禪家妙諦在虛寂
一切色相不滯凝七寶莊嚴喻言耳空花無果泡豈冰
徒以土木作佛事母乃已入最下乘吾特取其護法意
浮圖合尖獨力膺龜毛兔角苦結構紙皮筆骨堅擔承
嗚呼佛門中人有如此
無人能

題顧氏水榭

方塘十畝好漣漪聊作先生洗硯池
牆外帆飛雲片片簾前柳織雨絲絲
竹須問主看非易魚不畱賓樂可知
差喜地幽堪結夏摩挲便腹日哦詩

一飯

何許憐才意青裙摘露葵
飢如分瀨女食豈乞歌姬跡

敢疑求壯情逾烹伏雌賤貧身易感一飯報何時

遊惠山

曉緣梁溪行波滑一枝櫓忽聞溪流聲知是夜來雨舍
舟入林麓霽色澹天宇空翠霏濛濛孤煙起縷縷葉落
風自掃山缺雲或補言尋漪瀾堂寒碧見太古却訝尺
許深汲綆萬人取始信一眼泉中涵滿腹乳臨流澄水
觀斜髮則可數翻嫌塵網身到此成傖楚日斜歸路促
勝遊歎莽魯回首蒼山巔新月上高樹

秦園

看竹何須主林屨曲折通人行山翠裏秋在水聲中邱
壑因天巧松杉有古風我無書可賣敢問爾家東

冬夜布被爲偷兒所竊歌

歲事逼人暮不歸荒邨燈火猶鳴機到家欲睡忽失被
偷兒已去月在幃起看書篋亦狼籍破硯未碎紙亂飛
此中那得有長物知汝應笑所願違可憐布衾冷於鐵
補綻已似百衲衣明朝還擬入質庫不敢禦寒聊救飢
忽經肘篋捲而去晨炊何以供親闈黃蠶半瓶幸無恙
手自藏護謹掩扉夜闌無人三歎息不謂黔婁尙遭竊
恃陋不備吾誠疎擇肥不暇汝亦亟忍寒翻自笑多貲
爲有青氈盜乃窺今朝一絲真不掛好作袁安臥雪奇

甌北集卷一終

甌北集卷二

起己巳至
壬申秋

湯湖 趙翼 耘菘

將入都畱別杏川白峯諸同人

卯角交遊忽各天河梁攜手倍情牽春來南浦銷魂地
人在東風送別船此去誰招徐穉榻臨分重鼓伯牙絃
祇應旅館相思夜酒醒燈殘一泫然

北行

東風吹客上扁舟千里郵程聽棹謳我歎賣文難養母
人言投筆好封侯身如蕭寺初行脚世有歐門或出頭
慚愧古人躬負米不曾輕作遠方游

昔賢出具濟時功自顧何人也熱中世有我如滄海粟

身爲客聽布帆風畫師丹粉知誰賞村女梳粧恐未工
漫擬買琴輕一碎本無才可動羣公

鐵甕城邊漲沒隄長年戒檣候潮難愧無書畫扁舟興
來與江山健筆題鴈自南迴人亦北水流東去我偏西
書生命賤風濤慣敢望江神戢浪低

天涯飄蕩與誰親幸有韓湘共夕晨折柳亭邊千里路
運粗船上一家人黔驢技恐徒貽笑冀馬羣原有識真
等是孤兒須努力衰宗門戶久難振

時族孫敷
廷同行

至揚州附一貴人舟柁樓意當速行也就知其酬
應冗沓累日不發詩以遣悶

看竹何須問主翁一帆聊欲借薰風豈知附尾蠅貪捷

恰遇纏腰鶴未豐柔櫓靜依春水綠高桅閒挂夕燈紅
平山堂下鶯花路贏得清遊遣客窮

袞袞錢刀擁買胡千卿甚事也奔趨何當班列披香客
翻自身同逐臭夫名紙茜紅書大字軒車汕碧蕩流蘇
有人冷眼從旁看不禁攢眉倒一壺

揚州雜詠

附舟不發株守河干
則徵故事以消永日

東閣梅

東閣官梅誰所植少日曾吟去臘憶乞官重爲一花來
古來無此癡興極開筵召客醉其下大爲梅花增氣色
從此幽芳品格高不待廣平賦雕刻堪笑逋翁老無賴
欲聘作妻伴頭白花如有知未必從爲與何郎早相識

閤黎鐘

飢來趁食伊蒲供寺僧爲打飯後鐘一朝擁節鎮茲地
舊題已用碧紗籠作詩不覺鳴得意想見顧盼氣自雄
區區府鼠豈足嚇丈夫未遇固有窮六印歸來詫妻嫂
蘇秦此處真凡庸我笑明敷亦未免陋識母乃閤黎同

街卒報

奇章幕下狂牧之夜夜出擁青樓姬幕府主人若不知
但遣街卒潛護持一朝徵拜右拾遺別筵勸酒微寓規
客猶諱匿敢而欺從容袖出街卒詞幅幅系有月日時
俱報書記無禍危乃知愛士有如此不覺感愧涕滿頤

廣陵妖

空中劍響神兵戰血灑庭階亂如箭齋居從此事邪
部曲舊人皆不見少年才氣何英發西蜀南交兩定變
胡爲老去忽喪心擁兵不救帝下殿臣節旣改權亦移
軍府盡歸妖禍煽可憐塗炭廣陵城犬肉價高人肉賤

朱瑾墓

臣作參軍主蒼鵬主著鴉衣被臣扶誰何健者怒不平
拔劍斬之去主逼手提一顆血髑髏我爲嗣君殺此賊
橫呼四顧莫有應自刎無煩縛虎急功雖不成氣則雄
至今猶覺憤填臆毋怪當時墓上土能使瘞鬼盡伏匿

金帶圍

揚州芍藥天下稀忽幻四朶金帶圍幕府讌賓數不足

并邀過客停驂。驂後來四公，皆入相競傳花瑞。先示機
我思荆舒禍天下，名花豈爲增芳菲。然則非瑞乃妖耳。
鵲聲同此消息。微韓公自有晚香，固寧藉俗艷垂光輝。

平山堂

平山堂成大譙客夜折荷花。邵伯驛曉來一客問一花。
人面花姿五光澤，命妓傳花趣侑觴。花當落處輒浮白，
一時佳話遂千古。風流太守文章伯，後來流寓葉石林。
俯仰山光已陳迹，名人韻事安可常。但有千个琅玕碧。

梨花槍

養虎患成在腋肘。恩府恩堂驕悍久，一朝南下稱索糧。
欲取揚州作淵藪，蚰蜒寨已築長圍。豈意書生善墨守。

開門突山便迎擊劇賊俄驚被創走萬槩鋒前馬旋潭
不知中已殪酋首堪笑一枝梨朮槍三十年來無敵手

李制置

制置淮東作屏障被圍日久氣益壯臨安已陷降表簽
猶據孤城與敵抗惜哉四萬奪駕兵力戰難遮帝北向
或傳有客來說降飛檄急殺文丞相兩賢豈有相阨理
各自効忠不知狀沉淵未死終伏刀已先柴市歸天上

康山

獄中故人呼聲愴對山救我出羅網不惜輕身謁貴璫
可憐名已挂閹黨一朝蹉跌遂淪棄聊托俳優寄慨慷
南來邗水演歌伶自撥琵琶酒半醒彈出中山狼故事

美人也豎劍眉聽至今一片康山石絕似滄浪子美亭

草衣道人

修蛾皓齒嬋娟子小時流落平康里一朝蟬蛻謝紅塵
自把草衣換羅綺五乳峯前叅憨師歸來禪悟澄於水
輕撓柔櫓一扁舟名花異書載兩頭時拂么絃弄明月
或得佳句吟清秋君看蓮出綠波底豈有淤泥一點留

梅花嶺

閣部督師開幕府屹爲金陵守門戶羣奸處堂嬉燕雀
諸將爭地鬪豺虎苦心嘔血作調人猶冀殘棋一着補
可憐運去力不支城破伏尸膏鑕斧亂骨縱橫覓不得
或傳赴水死江潯梅花嶺頭葬招魂道命空思孝陵土

邵伯埭

謝傳旌庵地民居尙水涯名傳遺愛在湖納衆流皆一岸高千屋千艘列作街湯湯運河水從此派長淮

高郵道中

甓社湖邊路輕帆剪岸過波濤嫌地少鷗鷺比人多落日千竿網沿隄十里荷尾閤休易泄謂泄水諸屬掣取刷黃河

題露筋祠

女嬋媛兮宿中野蚊蟲口衆我則寡寧不畏死撓其鋒所惡有甚於死者吾聞白鳥營營亦知禮柏寢不近齊王體胡爲利嘴銛若芒偏向貞女叢瘠瘠將毋殺之成其名翻以咀嚼當湔洗可憐羣飛聲如雷麾之不去去

復來已拌屍飽鳥鳶寧假弔有青蠅哀身苟不辱吾
事畢嗜膚何惜捐殘骸噫嘻乎世間何限好顏色繡帳
羅幃愛甜黑身如蜂蝶貪爲嬉肉或螻蟻不屑食獨不
見露筋祠湖干颯爽乘雲旗今日試看筋露否明瑞翠
羽嚴威儀

淮陰釣臺

遺蹟長淮一釣臺常令過客此低徊蕭曹內本無君坐
雲夢間還謁帝來與噲伍憐魚服困假齊王伏狗烹災
千秋此獄難翻案畱作人間弔古哀

膾下誰憐早不羣布衣忽漫得風雲登壇何減隆中對
背水寧同溺上軍賤日流離艱一飯時來功業陋三分

英雄也自論遭際敢歎寒酸尙賣文

天妃宮

綺殿臨河干雄觀得未有拔地起千尺突入霄漢隄黃
樓五丈旗頓欲慚庠庠波光動軒楹雲氣灑戶牖朱扉
榜塗銀錦石砌交鉤天清旭日耀晶采出丹黝中有神
仙姝莊嚴似瑤母衣飄五銖輕珮綴七寶厚當胸蟠瓊
珞充耳瑩瓊玖綃應鮫室裁珠定龍宮剖靚好無凡心
獨處不匹偶侍兒香案旁却立班左右不作捧心嬌自
異宿瘤醜得非洛川神或者河伯婦繡幙雲霞飛綃旛
龜蛇紐庭廡則無聲城平淨不垢金檢元夷封秘笈霧
威守想見夜半時來朝萬魚鰕地迴神棲霧像肅人省

咎往來日千艘莫不駿奔走乞豈同土龍祭寧具芻狗
膜拜焚栴檀頭搶漚尊卣行廚烹伏雌折俎燂肥牡坎
坎音伐鼓烏烏歌擊缶歸鴉飽而去幾點入林藪豈惟
此河干人各奠醑醲遙聞滄溟上虔奉彌恐後每當檣
機摧望救慘呼吼紅燈歷亂來捷弗踰卯酉足覘威力
大覃及九垓九不知是何神具此烈不朽相傳林氏女
跨席渡清瀏歿遂乘雲旗洪濤勤扞振榮封爰累加章
服視冕難斯言雖足徵我意殊不取區區一弱息縱有
拯溺手安能屈四遠到處力抖擻吾聞天爲帝地媼則
后水陰乃次之妃號所由授義同風妓風例等斗母
斗辨名斷諸理何必實以某不然曹孝娥改屍江面負

亦有秋胡妻沉河謝悝悝胡爲弗疏封獨茲錫印綬我
乘上水船先過妃牖口一丈建瓴水因壺愈欲嘔奔洪
束呂梁急瀑倒廬阜捩柁爭懸流柄鑿詎相受順搯奔
馬尾逆拘怒牛首進寸轉退尺若或掣其肘可憐牽纜
夫繩穿十千耦旁出駒服驂斜編魚貫柳鴈刷一字翎
蟲屈百足夙波吒聲最哀邪許氣彌赴其時舟中坐命
比絲一縷身危索綠幢頭暈米浙數方信五石瓠貴過
千金帚踰時始出險鬢髮欲成叟泊舟祠廟下驚魂定
未久聊喜得安枕未敢酌賀酒風濤自茲始行狎鯨鱷
鰲竭來敬瞻謁溪毛薦芹苴邀福慈筏引據誠霧縠扣
一片馬當風肯借子安否

舟宿河堤

聽斷江南烏夜啼挑燈相對宿河隄波翻寒月中流閃
露壓垂楊兩岸齊短策千誰虛席左長安樂且出門西
偏餘鄉思難成夢數到遙邨報曉雞

宿遷道中

渡河風景異鄉思已如麻熱落枯腸飯糊塗滿面沙邨
居多草屋陸路有蓬車回首江南路茫茫雲樹遮

張子房祠

早師黃石公晚從赤松子斯人莫可見首尾當其狙擊
搏浪椎篝火狐鳴尙未起猝發固見節俠才輕舉猶少
深沉理胡爲後此變化神蟬蛻鴻冥益奇詭得非圮橋

進履時書外別有密傳旨不爲世用乃用世豈但全身
菹醢裏捐百鎰金一撮土棄萬戶侯一敝屣韓彭戮後
吾無猜此特餘智出囊底君看佐漢滅楚秦借他人力
雪已恥一報韓國亡一報韓王死劉季英雄人亦且爲
所使何況四皓雖神仙君直股掌玩之耳我來祠下飲
遺風悽指人才罕其比望古不見空躊躇高雲在空月
在水

微山湖隄晚步

野色青於染春流滑似膏風塵千樹亞浪捲半湖高落
日明鴉背平莎沒禾豪翻因觸鄉思髣髴我東臯

守牖

連朝上水船正歎行不疾忽然數尺水平地瞿塘出甃
石束作門懸板絕以絳啓閉有定期未可寸步軼遂使
千百艘傍岸排一一戢若鴈齒齊編若魚鱗密有帆不
得挂檣竿空似櫂可憐好順風束手竟坐失明朝開牖
去風又恐未必

牖吏未入流僅隨簿尉肩一朝權在手啓閉得自專偶
逢相識人賣情示周旋先放一兩版特送此一船鄰船
不解事意欲隨之前稍稍移楫上早被健卒鞭先生卷
書坐戒勿貪爭先吏方以牖豪如握大將權

一兩日一牖一牖四五里可憐坐船客株守愁欲死却
看衆水手熟睡正酣美既免跼生足何取肉消髀等是

一路人中懷異悲喜同牀乃各夢事固有如此

我行本無急隨地可暫留其奈有牕處絕少景色幽茅
屋數十家囂聲沸衆咻布帘賣燒春亦復當酒樓了無
可散步坐歎囚山囚牕口版微罅涓滴泄細流其下唼
水魚戢戢千萬頭身長不盈寸自視如蛟虬居然江湖
樂跳擲隨輕漚因之一笑粲也抵濠濮游

一聲牕版開循序乃可上誰何稱健者拏舟氣跳盪伺
隙凌前舟前舟那肯讓相持不相下轉自生阻障斯須
潛艤來孰敢與之抗退避仍艤權袖手坐相向待其尾
尾過上流已減漲牕吏忽封牕又俟明朝放

柁樓戲題

貧客出門但附舟官船不住住柁樓身雖長不滿七尺
樓高四尺我則修會須盤膝作栳捲未免鞠躬如釣釣
踟躕足學老僧結病癯軀比丈人孥偈仄疑入輿櫬臥
刺促訝同檻車囚吟詩偶到得意處忽起不覺蓬打頭
古人舫齋貯書畫亦有船屋狎鷺鷗綠簑青箬可乘興
茶竈筆牀堪尋幽胡爲我獨困攣曲爲籠中鳥圈中牛
臨風俯仰忽自笑此安足爲壯士蓋世間何限折腰拜
人前儘有低眉求我雖矮簷暫托宿放眼自可凌滄洲
况餘湯和據脊勢兼少范涇騎危愁跳遠便當車四望
憑高更抵閣六浮何須越中行晚飯恰似天上坐春流
樓下官船貴客住且勿嗤我巢睫謀元龍湖海氣百尺

終在君等頂上游

分水龍王廟

一水分南北中疑有轉輪地應天下脊我亦路岐身長
策潘從事精心汝老人如何來往客但解祀龍神

舟行絕句

過盡牐門三十六順流方快滑於油誰知河路如弓曲
又遣團團作磨牛

纔得收篷又挂篷
轆轤忙煞老艚公清吟不記河流轉
只道朝南暮北風

卽景

野田有砂有礫邨屋半草半泥雞如鳥能上樹馬可當

牛駕犁

燒春酒釀棗梨薄夜餅包蔥韭炊飯火燃炕頭灌田水
汲井口

單髮女騎驢背其夫欣爲執鞭拾通兒逐馬尾其父快
於積錢

泊頭鎮卽目

曲曲圍牆短短籬黃塵和粉點胭脂春來北路稀花事
人在東風學柳絲枉自數錢工蛇女方將乞食到歌姬
河干小泊超神觀欲笑阿難被咒時

入都依外舅劉午巖先生館舍

時先生客於
宮保尹公第

倦羽飄飄得暫投蕭齋燈火話羈愁我來客路誰青眼

公在名場已白頭五畝何時乘下澤一壺還仗引中流
旁人不識飢驅出只道從師負笈游

辛苦蟲魚手自箋公車曾載牘三千病猶作客因賢主
老不趨時讓少年篋裏一經垂就業書中二頃未成田
憐公已是依人廬我又依公似掛磬

敷廷病臥僧寺

旅食愁方劇那堪病日增參苓燼沸火溲溺被凝冰連
日鴉鳴屋殘更鼠輒燈老僧催徙寓久已不能興
作文空罵鬼剪紙擬招魂客已催喪具醫誰識病根深
愁孤子絕況有老親存亦自知危篤喃喃嚔語昏
病憐渠伏枕來是我同航命比蜚蜚倚家猶燕燕望可

憑慚似几相守但聯牀剩有呼號切投筭卜藥方

岫嶠碑歌借劉穆庵孝廉作

滿堂蝌斗何蜿蜒
蒼然鴻濛落我前十指
欲捫不敢近
中有神聖千萬年
伊昔昏墊五行汨
龍漢餘劫留水厄
人命慘填魚腹
楊民居爭結鳥巢
黃熊九載績弗效
聖子起任平成
責齋夔威夢蒼水
使告以宛委貯金策
肅刑白馬啓石函
玉宇銀編妙尋繹
遂乘山櫟跨泥橈
分醺涿洞關壑隔塗山
弗顧子泣呱轅轅并愁妻
見嚇亥章奉令爾跟踵
支祁就縛鎖骨骼
山河兩戒次第清
萬古坤輿奠衽席
功成勒銘告歲事
岫嶠山尖斲貞石
文括山海岳瀆經
字挾沮誦倉頡蹟
堯碑舜碣不可見

世間點畫此最昔開天古篆形模奇難與後人較波磔
想見摩崖作擘窠六丁下照火光赤我聞此碑久失稽
道人偶見旋復迷杜陵所觀已贗本肥而失真燭若犀
昌黎親到猿猴窟千搜萬索無端倪此刻何時出磨洗
使我創睹驚且喜得非鍊石充逸少或者朱繇貌道子
古來僞物那殫述巫覡步禹紂接趾劉炫歸藏冒殷易
廣微汲冢托周史目無罔兩雙明瞳真假誰能定片紙
我重聖德垂寰瀛珍之不管尺璧瑩洪荒翦樛數字外
口不能讀心敢輕盲翁捫籥但取似葉公好龍固爲名
崔融作贊楊慎釋一重公案何必更況茲筆力自奇古
不真亦是好手成貌爲敷卽衣冠氣如閼氏亦愧偏精

君不見七十七字長八尺蛟螭攫拿龜魚擲頑蟲蝕木
蛙眼枯雄雷劈山斧痕裂繫椎欲破渾沌竅鑄鼎直寫
罔兩魄嶧碑獵鼓空爾奇籀斯安有此體格縱輪明堂
琥璜價也比宮縣追蠡迹

分咏都門古蹟得延壽寺

按北狩行錄及燕雲錄析津日記宋徽宗至燕
山寓延壽寺欽宗寓愍忠寺七月中旬鄭后病
欽宗諸妃后俱來問安卽今琉璃廠延壽寺也
牟駝岡下去匆匆旄葛曾歇此寺中花石網空成良嶽
鐘魚界豈是離宮兩河有地更新主四游無家作寓公
遺跡不須悲古刹黃龍北去更途窮

往事無端感靖康但知割地少周防削瓜疆土蝸爲國
厝火君臣燕處堂空有同聲呼少帝絕無一戰作降王
可憐問寢循家法古寺猶傳禮佛香

賀穆庵納妾

君家故事艷逢仙又見蕪菁訪洞天人到梅花初月上
春當楊柳未風前較書閣靜偷繙帙繡佛燈清學劈箋
笑我三生狂杜牧空餘禪榻颺茶烟

送敷廷歸

纔欣病起又離愁相送那禁淚逆流歸處正當吾故里
來時况與汝同舟情深疎屬如同氣身在微名且緩謀
獨有青衫憔悴客天涯依舊賈胡留

病軀寧易說歸耕點鬼塲邊幾度行
莊舄吟聲孤客痛
子瞻死信舉家驚君病時家
中訛傳已死扶藜命托平頭杖
煨藥功分
折腳鐺今別還愁從夢寐臨岐執手重分明

赴津門

西笑到長安求官擬唾手豈知一青衿易地成棄帚
南庠試北闈令甲所不受聞有半盆籍遊客借已久入作
醫舍生可列鄉射耦爰乘薄策車路指丁沽口潞堤直
於並津河綠於酒將爲假途行先防扞關守詰者嚴誰
何未敢告以某譬如投秦客變易姓名走孟嘗出函谷
夜半作吠狗曹公誰追兵黃馬者在後居然春絮飄着
地又生柳雖貪奮飛便終愧說遇醜古人重始進出處

戒其苟聘書邵公卿移文畏朋友伊余獨何爲自赴藏
疾藪盜泉不暇擇渴來飲一斗跡如鳩占巢情類雉求
牡旅枕夢醒時何地謝怙怙一笑聊解嘲比例得八九
徐凝江右士赴杭覓舉首名臣范履霜亦以朱說取士
窮則躁進此事古來有要當期大節微骨豈足垢

津門呈葉東壺運使

也隨土著入膠鬲失一兵仍得一兵唇舌換如兒學語
姓名變豈客逃生鵬當北徙貪風便鵲不南飛羨月明
說與先生應笑絕幾同火迫鄴侯成

客興

京國依人慣謀生倚提刀布衾寒似鐵名紙敝生毛燈

火蟲聲唧風霜馬骨高那禁鄉思切此目正持螯

座主休寧汪公枉招下榻敬呈

六六天郭氣鬱麗挺生耆傾道經邦文章一代推燕國
風度千秋繼曲江司馬鑑開書局纂

帝鴻硯贊筆椽扛身當鼎鉉和羹久早晚宣麻下鎖窗

退食歸來雅興長三閭新築職思堂公齋名杜門客少心如

水謀國年深髯有霜運腕字開千石弩等身書擁一爐

薪履禁依舊儒生樣誰識班聯日月旁

東京遊學愧何蕃納屨虛叨國士論求髮早耽韓愈集

出身幸及醉翁門鯨鏗建發華鐘響駕諧針黹繡線痕

那得對公無感激津梁親爲指遙源

土城懷古

德勝門外土阜本元都故址然土人至今呼爲
蕭太后土城必有所自按遼聖宗母蕭氏最賢
岐溝關之捷益津關長城口及瀛洲之戰澶淵
之役皆與聖宗同行此或其駐師地也明英宗
陷土木後也先擁之至土城景泰帝使王復趙
榮出見亦卽此地郊行過此各咏二首

郊圻屹立土門崇遼后曾經此詰戎赤帝敢傷吾子白
雌風偏勝大王雄封椿坐困南朝費歲幣終來內府充
千載遺踪有雙阜猶傳女隊簇妝紅

負展圖成髣未華手攜嗣主戰邊沙不聞宮掖悲人薤

肯使兵塵喪帝妃粉黛三千歌入塞燕雲十六紀傳家

笑他瓊島妝臺女空把才名後代誇

太液池瓊華島舊有金章宗李宸妃妝臺

鸞輿一狩去無蹤被擁翻來此索供故國歸如華表鶴
穹廬困作豫且龍伶仃書幣通雙使咫尺宮庭隔萬重
想見此時歸思亟九哥傳語比欽宗

豈是遊觀繡旬時依然烟樹鬱參差

薊門烟樹爲京師八景之一卽此地

權歸

介弟身難贖國有新君貨不奇絳闕敢期呼蹕入青衣
幸免捧觴悲羈畱尙荷諸酋意不枉名傳好太師

題上摩詰輞川雪溪小幅

空山雪霽清無塵琪花瓊蘂明蕭晨寒沙水縮碧溪淺
欲凍未凍猶漣淪虛齋十笏嵌湖鰭繩牀經案位置勻

舍旁翠篠壓殘雪微風戛之玉屑紛悄然如入竹里館
琅玕千个搖寒筠籀題傳是右丞筆自寫輞口物色新
我聞輞川圖徑丈幽景二十俱臚陳贊皇父子妙題識
黃九秦七跋尾親繫茲小幅僅盈尺絹素漫漶真不真
細觀石痕小斧劈筆法的是王家皴樹杪雀爪根丁櫨
點雪粉更浮泥銀得非全圖外別寫割取一片歆湖春
宜乎文沈詫墨寶石田待詔
俱有跋重之不異拱壁珍噫嘻乎鬱
輪袍裝俳優隊凝碧池愧盜賊臣論品亦只在中下徒
以詩畫妙入神遂令千載慕高逸如愛西子忘其鬢可
知文采亦自不可少有如此畫與此人

送午巖先生南歸

折柳都亭動別愁西風潞水正涼秋去偏一路多黃葉
來已三回到白頭落榜誰憐老名士還家仍客近諸侯
歸仍就計制長安回首情何限遂作人間馬少游

姓名薦牘兩番叨

宏博經學凡兩被薦

屢躋仍看志未撓宿望豈矜

徵辟重

清時忍以隱淪高漫同鄰女還分火從此庖

丁好善刀書帶草溪窗影綠一編著述尙堪豪

八月十六夜對月

冰輪漸減若爲磨客裏流年感逝波佳節又看今歲去
清光還似昨宵多定知吳質眠猶未漸恐姮娥瘦奈何
不忍聽他從此缺閒軒看到過銀河

新安汪氏雙忠節歌爲汪用明上舍作

新安汪家有執事一門忠節奇堪記秀才仗策去從軍

健婦持門望歸騎

汪校榮妻戴氏姪某妻吳

是時粵嶠星北流兩生入參

帥府籌嚇蠻書捷磨盾鼻號烏弓勁摧旄頭累功偕守
恩恩郡兵燹初經城郭磷燼成海蜃作樓櫓叱起沙蟲
練營陣如何反側未盡平鷗張豕突何隙生酋龍兵陷
芳木柵黨猶蠻逼邕管城空吞漫張鼓聲死悲哉兩生
同嚼齒時來氣吐笏山雲運去魂歸練江水笏山雲碧
練江清家有雙螭卜鏡聽望夫欲化武昌石復矢空崩
莒國城胥非無波誓身蹈可憐膝下俱弱息忍死須臾
事倍難捐軀慷慨非無力深閨夢斷哭刀鏗各撫遺孤
茹百艱土花有血都成碧湘竹無痕不作斑晨炊蠶羹

暮豆粥繡佛燈前自課讀
爾得忠魂飯一盂啼乾寡母
淚千斛嗚呼此事今百年
當時倉猝少人傳荒祠莫奏
傳芭曲表宅廕遲綽楔錢
幸有宗門老孫子目抱遺芬
質惇史燭星殞再輝斗芒虹
氣消仍貫日珥由來忠節
不終淪丹青雕換長鮮新却
憐髻髻招魂日更有披緇

入道人

枝榮安程
削髮爲尼